

le confeffay. Monsieur le Gouverneur, Monsieur le Cheualier de l'Isle, & quantité de nos François, se trouuerent presens à ceste action: Le malade ayant receu son Createur, ie priay encore qu'on allast querir les fainctes Huiles pour luy donner l'Extrême-Onction; pendant cés allées & venuës, ce bon Neophyte fit son action de grace à Dieu, & comme ie luy eut declaré qu'vne Dame d'eminente qualité, Niepce d'vn des plus grands du Royaume, auoit enuoyé ces bonnes Religieuses pour le fecourir & tous les siens; ie ne pouuois luy faire entendre la grandeur de Monseigneur le Cardinal, & de Madame la Duchesse d'Aiguillõ sous autres termes, il s'écria: Vous qui auez tout fait, donnez vostre Paradis à ce grand Capitaine, & payez bien au Ciel tous les biens que nous fait fa niepce en terre. Vous estes tout bon, ayez encore pitié de celuy qui nous a logé, & tous nos enfans. Apres qu'il eut fait ses prieres, ie luy demanday s'il se fouuenoit bien de cette grande veuë du Paradis, & de l'Enfer, qu'il auoit eu vn peu apres son Baptesme [86] il y a plus d'vn an: ie luy recommanday fur tout qu'il se donnaft bien garde de mentir ayant l'ame sur le bord des léures, & nostre Seigneur encore present dans son cœur. Nikanis, il se peut faire que ie n'ay pas dit vray, me fit-il, car ie t'ay dit que i'auois veu la demeure du grand Capitaine du Ciel; ie ne fçay pas si c'estoit fa mais-õ, mais ce que i'ay veu estoit si beau & si rauissant, que ie crû que c'estoit là fa demeure, il n'y a rien de semblable en terre, i'ay encore ceste beauté si imprimée en l'esprit, que ie ne croy pas en perdre iamais la memoire. En fin nous luy donnasmes l'Extrême-Onction, qu'il receut auec de grands ressentimëts de douleur d'auoir offensé